

Univerzitet u Sarajevu

Služba za međunarodnu saradnju

Izvještaj o međunarodnoj saradnji

2022

1 UVOD

Kada je u pitanju međunarodna saradnja na Univerzitetu u Sarajevu, možemo reći da smo u kalendarskoj 2022. godini uspješno vratili (čak i premašili) stare brojke prije pandemije i omogućili kvalitetnu implementaciju internacionalizacije naše institucije. Služba za međunarodnu saradnju Univerziteta u Sarajevu (dalje u tekstu Služba), uz podršku nadležne prorektorice, a u saradnji sa prodekanima/icama, koordinatorima/icama i saradnicima/icama za međunarodnu saradnju na članicama ovog univerziteta, te kroz svakodnevnu komunikaciju i implementaciju aktivnosti sa inostranim akterima i visokoobrazovnim institucijama doprinijela je kvalitetnoj internacionalizaciji visokoobrazovnog prostora na nacionalnom, regionalnom, evropskom i međunarodnom polju. Organizacijom međunarodnih dešavanja (međunarodni staff week, međunarodni sajam stipendija), učešćem u međunarodnim konferencijama (savjetovanje Budućnost obrazovanja, međunarodni seminar u Rimu, učešće na BHAAAS-u), koordiniranjem međunarodne dolazne i odlazne mobilnosti, uspostavljanjem saradnje kroz bilateralne sporazume, administracijom projektnih prijava na programe finansirane iz EU izvora, te promocijom međunarodnih poziva za dostavljanje projektnih prijava, svi pomenuti akteri omogućavaju implementaciju procesa internacionalizacije u oblasti visokog obrazovanja gdje se Univerzitet u Sarajevu prepoznaje kao atraktivni i punopravni partner u mnogim međunarodnim programskim i projektnim pozivima. Redovno Vijeće prodekana i koordinatora je nastavilo sa svojim aktivnim radom (sastanci jednom mjesečno), te su sve donešene odluke i smjernice doprinijeli kvalitetnom održavanju međunarodnih aktivnosti i dešavanja na Univerzitetu u Sarajevu. Služba je, zajedno sa prodekanima i koordinatorima za međunarodnu saradnju aktivno učestvovala u javnim raspravama i konsultacijama kada su u pitanju dokumenti kojim se reguliše visoko obrazovanje (Prednacrt zakona o visokom obrazovanju, Jedinstveni pravilnik o radu). Cilj je podignuti svijest o važnosti međunarodnih projekata i međunarodne mobilnosti u cilju provođenja Strategije internacionalizacije ove visokoobrazovne institucije. Kad je riječ o Strategiji, i tu su ostvareni dobri rezultati. Set indikatora koji su uspostavljeni kako bi se pratio proces internacionalizacije pokazao je rast, iako je imao neočekivanu prepreku – pandemiju korona virusa.

2 POKRETAČI I NOSIOCI MEĐUNARODNE SARADNJE

- **2.1. Služba za međunarodnu saradnju**

Centralni ured ili Služba za međunarodnu saradnju je i dalje aktivni nosilac međunarodnih aktivnosti Univerziteta u Sarajevu, bilo da je riječ o aktivnostima na samom Univerzitetu i/ili aktivnostima koje se realiziraju tokom boravka delegacija UNSA izvan Bosne i Hercegovine. Svi sastanci, susreti, kao i treninzi su se vratili u formu održavanja uživo, a mobilnosti studenata i osoblja su nesmetano nastavljani i u toku 2022. godine.

- **2.2. Prodekani/ice, koordinatori/ce i saradnici/ce za međunarodnu saradnju na (pod)organizacijskim jedinicama Univerziteta u Sarajevu**

Na članicama Univerziteta u Sarajevu (pored direktnih učesnika mobilnosti – studenata i osoblja) nosioci međunarodnih aktivnosti su prodekani/ce, koordinatori/ce i stručni saradnici/ce za međunarodnu saradnju. Djelujući individualno na svojim jedinicama Univerziteta u Sarajevu ili zajednički na nivou univerziteta, neupitan je aktivan angažman i želja da se institucionalizira internacionalizacija ovog ustanove, sa fokusom na proces „internacionalizacije-kod-kuće“.

- **2.3. Odbor za međunarodnu saradnju**

Odbor za međunarodnu saradnju je imenovan kao stručno i savjetodavno tijelo Senata UNSA sa devet članova (po jedan predstavnik svake grupacije nauka/umjetnosti iz reda nastavnika/saradnika, predstavnik Službe za međunarodnu saradnju, predstavnik Studentskog parlamenta i prorektor za međunarodnu saradnju) a koje doprinosi aktivnim procesima internacionalizacije ove ustanove.

- **2.4. Studenti, nastavno/naučno/umjetničko i nenastavno osoblje**

Studenti, nastavno/naučno/umjetničko i nenastavno osoblje Univerziteta u Sarajevu su uspješno nastavili implementaciju međunarodne mobilnosti u toku 2022. godine, čemu svjedoče i statistički podaci.

3 UGOVORI

Trenutno, Univerzitet u Sarajevu, zajedno sa svim svojim članicama ima **198 aktivnih bilateralnih međunarodnih sporazuma**, od čega se **157** odnosi na bilateralne memorandume o saradnji. U toku 2022. godine potpisano i/ili produženo je **9** bilateralnih sporazuma, dok je inicirana saradnja sa njih **4**. Kada su u pitanju Erasmus+ sporazumi za međunarodnu kreditnu mobilnost studenata i osoblja, u 2022. godini sklopljeno je ili produženo **41** sporazum koji su omogućili finansijsku podršku za međunarodnu mobilnost studenata i osoblja od 2022. do 2025. godine. Lista aktivnih bilateralnih i Erasmus KA171 sporazuma dostupna je na <https://www.unsa.ba/istrazivanje-i-saradnja/medunarodna-saradnja/bilateralni-sporazumi-o-saradnji>.

4 MEĐUNARODNE MREŽE I ČLANSTVA


Mreže i asocijacije predstavljaju najčešće konzorcij visokoobrazovnih institucija u cilju uspostavljanje zajedničke saradnje i izgradnje kapaciteta kroz organizovanje različitih dešavanja i pokretanjem projekata. Članstvom u međunarodnim mrežama i asocijacijama jačaju se evropske i svjetske istraživačke institucije i doprinosi razvoju međunarodnog profila institucije. Univerzitet u Sarajevu, zajedno sa svojim članicama je član **30** međunarodnih organizacija i mreža. U cilju nastavka prepoznatljivosti našeg univerziteta na evropskoj ali i međunarodnoj sceni, Služba je pripremila projektne prijave za članstva u nekoliko međunarodnih mreža u okviru Javnog konkursa za finansiranje/ sufinansiranje naučnoistraživačkih i istraživačko-razvojnih projekata u Federaciji Bosne i Hercegovine u 2022. godini - IUC Dubrovnik, UNICA, Uniadriion, AUF, Sgroup, EUA, DRC, AARC. Pregled svih mreža je dostupan na <https://www.unsa.ba/istrazivanje-i-saradnja/medunarodna-saradnja/mreze-i-asocijacije>.

5 MEĐUNARODNA MOBILNOST

Mobilnost predstavlja međunarodnu aktivnost gdje se studentima omogućava da dio studijskog programa (jedan ili više semestara) provedu na nekom stranom univerzitetu, dok se nastavnom, naučnom i nenastavnom osoblju omogućava profesionalno usavršavanje kroz kraći boravak na partnerskim univerzitetima. Standardne aktivnosti Službe na početku svakog semestra, ali i u toku, podrazumijevaju organizovanje informativnih dana, radionica i sesija, online promociju putem web stranica i društvenih mreža, posjete potencijalnih kandidata uredima, organizovanje sastanaka i dr. Također, nakon promocije podrazumijeva se i aktivno učešće potencijalnih kandidata u pripremanju i prikupljanju dokumenata, te obezbjeđivanju potrebnih potpisa od strane odgovornih osoba (dekana i prodekana).


- **5.1. Odlazna mobilnost**

Ukupno **619** studenata i osoblja Univerziteta u Sarajevu je iskoristilo priliku za međunarodnu mobilnost na inostranim visokoobrazovnim institucijama u toku 2022. godine u svrhu studijskog i/ili profesionalnog usavršavanja. Od ukupnog broja, najveći broj su studenti – **296**, nastavnog osoblja u svrhu držanja predavanja **144**, te boravak nastavnog i nenastavnog osoblja u svrhu profesionalnog usavršavanja **179**.



- **5.2. Dolazna mobilnost**

Univerzitet u Sarajevu je u toku 2022. godine bio domaćin za **515** inostranih studenata i osoblja, od čega **178** studenata, **187** nastavnog osoblja koje je došlo u svrhu držanja predavanja na Univerzitetu u Sarajevu, te **150** članova nastavnog i nenastavnog osoblja u svrhu studijskog i/ili profesionalnog usavršavanja. Tokom održavanja sedmog i osmog staff weeka, naš univerzitet je bio domaćin za njih ukupno **84** članova nastavnog i nenastavnog osoblja koji su uzeli aktivno učešće u programu našeg događaja.



6 MEĐUNARODNI PROJEKTI

- **6.1. Erasmus+**

Nakon pauze uzrokovane pandemijom Covid19 u 2020. godini, Izvršna agencija (EACEA) je otvorila novi poziv za dostavljanje projektnih prijava finansiranih iz EU fondova (Erasmus+). Prvi poziv u okviru Erasmus+ programa sa novim finansijskim budžetom za period 2021-2027 objavljen je u novembru 2021. godine sa rokom za dostavljanje prijava u februaru 2022. godine. Tim povodom Nacionalni Erasmus+ ured u BiH je organizovao dvo-dnevnu

informativnu sesiju (online) u cilju promocije međunarodne dimenzije u polju visokog obrazovanja. Kao i svake godine, Služba za međunarodnu saradnju je još početkom akademske 2021/2022. godine pripremila online vodič o **Uputstvo za pripremanje projektne prijave Univerziteta u Sarajevu za Erasmus+ poziv** koje sadrži podatke o Erasmus+ programu, rokovima i načinu prijave za pojedine ključne aktivnosti, te je izrađen popratni materijal kako bi se olakšala komunikacija sa Rektoratom radi dostavljanja potpisane i pečatom ovjerene dokumentacije u toku prijave.

Na ovogodišnjem konkursu za dostavljanje projektnih prijedloga kroz međunarodni obrazovni program Erasmus+, objavljen od strane Izvršne agencije za audiovizuelne komunikacije, kulturu i obrazovanje iz Brisela, članice našeg univerziteta inicirale su učešće u ukupno 104 projektnom prijedlogu, od čega 24 projektna prijedloga za akciju Erasmus+ izgradnja kapaciteta (2 koordinatorska i 22 partnerska), 7 projektna prijedloga za akciju saradnička partnerstva, 65 projektnih prijedloga za mobilnost, Jean Monnet 1 projektni prijedlog te akcija virtualna razmjena u regiji zapadnog Balkana 2 projektna prijedloga, kao i pet zahtjeva za učešće u CEEPUS mrežama. Ukupno 18 organizacionih jedinica, te Rektorat i podorganizaciona jedinica Centar za interdisciplinarne studije učestvovalo je u pripremi projektnih prijedloga. Najzastupljenija aktivnost je mobilnost studenata, nastavnika i osoblja gdje je pripremljeno 65 projektnih prijedloga, od čega 62 od strane Službe za međunarodnu saradnju u Rektoratu te po jedan sa Fakulteta sporta i tjelesnog odgoja, Fakulteta islamskih nauka i Centra za interdisciplinarne studije.

Rezultati su bili dostupni tek u oktobru, što je dosta kasno u odnosu na prethodne godine. Univerzitet u Sarajevu je ostvario učešće u sljedećim projektima:

- **6.2. Izgradnja kapaciteta:**
 - Arhitektonski fakultet (1 projekat – koordinator)
 - Fakultet za saobraćaj i komunikacije (2 projekta - partner)
 - Veterinarski fakultet (1 projekat - partner)
 - Katoličko-bogoslovni fakultet (1 projekat – partner)
 - Rektorat (1 projekat – partner)
 - Građevinski fakultet (1 projekat – partner)

7 OSTALI MEĐUNARODNI PROJEKTI I DEŠAVANJA

U toku 2022. godine, na Univerzitetu u Sarajevu je održano ukupno **844** međunarodna događaja. Nakon relaksiranih epidemioloških uslova broj online organizovanih događaja je smanjen i iznosio je **93**, hibridno (uživo i online) **44**, dok je broj događaja uživo bio **707**. Kada je u pitanju vrsta događaja, prednjače predavanja, radionice, seminari te okrugli stolovi (**578**), a zatim konferencije, kongresi, simpoziji i tribine (**210**). Održano je i **17** međunarodnih (zimskih ili ljetnih) škola, te **39** umjetničkih i sportskih manifestacija.

7.1. Učešće u savjetovanju Budućnost obrazovanja

Služba, u saradnji sa prodekanima i koordinatorima, je predstavila zajednički rad na temu „Međunarodne vizije UNSA u 2030 – Strategija Brain Gain“ na Savjetovanju „Budućnost obrazovanja: Visokoobrazovanje za održivi razvoj 2030 održano 25. januara 2022. godine u organizaciji Ministarstva za visokoobrazovanje i mlade Kantona Sarajevo. Kroz zajednički tematski članak, grupa autora je predstavila stanje međunarodne mobilnosti koja podiže internacionalizaciju institucije na kvalitetniji nivo i time otvara mogućnost unapređenja same institucije (izgradnja kapaciteta, otvaranje istraživačkih centara, organizovanje međunarodnih konferencija, seminara, uvezivanje akademske zajednice, razmjena studenata svih ciklusa, razmjena gostujućeg nastavnog, istraživačkog i nenastavnog osoblja, kao i prijavljivanje na međunarodne projekte). Navedeno je da s ciljem što boljeg razumijevanja i ispravnog provođenja Bolonjskog procesa, potrebno je obezbijediti dvosmjernu mobilnost (stvaranje povoljnog normativnog ambijenta za priznavanje mobilnosti i ostvarenih rezultata za odlazne studente, kao i kreiranje studijske ponude za dolazne studente) što je svakako uslovljeno i stvaranjem olakšanih uslova dolaska/ulaska u zemlju. Mobilnost predstavlja vrijedan mehanizam u sistemu osiguranja kvaliteta visokog obrazovanja jer indirektnim mehanizmima (razmjena studenata) potvrđuje usaglašenost kurikuluma, ishoda učenja i drugih mjerljivih parametara kvaliteta Univerziteta u Sarajevu i institucija u EU, te vrši razmjenu novih ideja i otvara nove vidike u obrazovanju.

7.2. Učešće na Međunarodnom seminaru u Rimu

U saradnji sa profesorom Massimom Maria Canevom, direktorom Rome International Seminara i predsjednikom Evropske asocijacije za međunarodne studije (European Association of International Studies – AESI), Univerzitet u Sarajevu (UNSA) već dugi niz godina učestvuje u posebnom obliku obrazovanja za izgradnju mira. Prorektorica za međunarodnu saradnju UNSA prof. dr. Enita Nakaš i viši asistent Mirza Hebib s Pravnog fakulteta UNSA sudjelovali su na Rome International Seminaru održanom u gradu San Martino al Cimino i Rimu, od 13. do 21. maja 2022. godine, a u okviru programa međuuniverzitetske saradnje za promociju mira i kulture dijaloga, organiziranog od strane Univerziteta Roma Tre, AESI Europa i drugih. Program je realiziran uz podršku Italijanske agencije za razvojnu saradnju. Dugogodišnje iskustvo prof. dr. Massima Maria Caneve, rezultiralo je organizacijom internacionalnih studijskih programa i seminara. Program se razvio kroz promociju međuuniverzitetske saradnje za mir između Univerziteta u Sarajevu i Univerziteta u Beogradu neposredno nakon potpisivanja Daytonskog mirovnog sporazuma, a danas u okviru istog participiraju predstavnici Ujedinjenih nacija, te predstavnici univerziteta s područja Bliskog istoka (Hebrejski univerzitet, Palestinski univerzitet, Privatni Univerzitet u Siriji, USEK Lebanon i AUM Madaba u Jordanu). Podršku programu daju i Državni St. Petersburg ekonomski univerzitet, Univerzitet u Beču, Univerzitet u Geteborgu, St. Mary Univerzitet College u Londonu and UNED Univerzitet u Madridu. Analizirajući značaj međuuniverzitetske saradnje za razvoj kulture dijaloga i promocije mira sudionici seminara prisustvovali su generalnoj audijenciji kod pape Franje i razgovoru s generalnim sekretarom Svete Stolice o njihovoj ulozi u promociji mira i kulture dijaloga.

7.3. Učešće na BHAAAS-u

Univerzitet u Sarajevu je učestvovao i na 13. danima Bosanskohercegovačke-američke akademije umjetnosti i nauka (BHAAAS). Dani BHAAAS-a su najposjećenija naučna konferencija u regiji koja je ugostila više od hiljadu učesnika, uključujući stotine predavača iz 26 zemalja koji su predavali na 33 simpozijuma i to sve na četiri lokacije. BHAAAS od svog osnivanja 2009. godine organizuje ovu konferenciju čiji je cilj promocija nauke i umjetnosti, spajanje naučnika iz Bosne i Hercegovine i širom svijeta, razmjena znanja i iskustva u akademskim zajednicama sa fokusom na studente. Dani BHAAAS-a promovišu istinske društvene vrijednosti i zbog toga su se godinama razvili u renomiranu konferenciju. Prorektorica prof. dr Enita Nakaš je učestvovala u panelu za koji je bilo potrebno prikupiti podatke o uticaju kratkih mobilnosti na odlazak mladih, kao i analizirati podatke o uticaju mobilnosti na pozitivne promjene lokalnog društva.

7.4. Međunarodna sedmica obuke osoblja (Staff week)

Univerzitet u Sarajevu, po uzoru na mnoge evropske univerzitete organizira aktivnosti u cilju što bolje promocije programa mobilnosti kao što je Erasmus+, te povećanja međunarodne dolazne i odlazne mobilnosti studenata, nastavno/naučnog i nenastavnog osoblja u cilju profesionalnog usavršavanja i akademskog napredovanja, kao i sticanja međunarodnog iskustva.

Na Univerzitetu u Sarajevu je od 16. do 20. maja 2022. godine održana **Sedma međunarodna sedmica** obuke za inostrano nastavno i nenastavno osoblje u periodu, u organizaciji Službe za međunarodnu saradnju Univerziteta u Sarajevu. Riječ je o petodnevnom događaju koji je uključivao seminare, radionice, prezentacije ali i aktivno učešće međunarodnih partnera u predstavljanju svojih institucija, studijskih ponuda, kao i rada na implementaciji Erasmus+ programa. Ovu sedmicu ujedno su pratile društvene i kulturne aktivnosti. Tim povodom, Rektorat Univerziteta u Sarajevu bio je domaćin predstavnicima 27 visokoobrazovnih institucija koji dolaze iz cijele Evrope:

1. Katolički univerzitet u Leuvenu, Belgija
2. Sveučilište u Zadru, Hrvatska
3. Karlov univerzitet u Pragu, Češka Republika
4. Masarykov univerzitet u Brnu, Češka Republika
5. Palacky Univerzitet u Olomoucu, Češka Republika
6. Katolički univerzitet u Lili, Francuska
7. Univerzitet Poitiers, Francuska
8. Univerzitet Friedrich Alexander Erlangen-Nürnberg, Njemačka
9. Univerzitet Martin Luther Halle-Wittenberg, Njemačka
10. Univerzitet Saarland, Njemačka
11. Univerzitet u Konstancu, Njemačka
12. Univerzitet Vytautas Magnus, Litvanija
13. Univerzitet Adam Mickiewicz, Poznań, Poljska
14. Univerzitet u Lodžu, Poljska
15. Univerzitet Nikola Kopernik u Torunju, Poljska
16. Nova univerzitet u Lisabonu, Portugal

17. Politehnički institut Castelo Branco, Portugal
18. Politehnički institut Viseu, Portugal
19. Univerzitet u Evori, Portugal
20. Univerzitet Alexandru Ioan Cuza, Rumunija
21. Univerzitet umetnosti Beograd, Srbija
22. Univerzitet u Barseloni, Španija
23. Univerzitet u Sevilji, Španija
24. Univerzitet Balearskih ostrva, Španija
25. Univerzitet u Valladolidu, Španija
26. Univerzitet u Granadi, Španija
27. Univerzitet Kütahya Dumlupınar, Turska

Osmi staff week je održan u periodu 24-28. oktobar 2022. godine. Teme osmog *Staff week*a su bili problemi i izazovi koje Erasmus koordinatori imaju prilikom implementiranja međunarodnih mobilnosti. Na ovaj način, na jednom mjestu kreirali smo prostor i platformu za razmjenu mišljenja i informacija o najboljim praksama u prevazilaženju prepreka u međunarodnim dolaznim i odlaznim mobilnostima. Univerzitet u Sarajevu je bio domaćin predstavnicima 12 visokoobrazovnih institucija koji dolaze iz sljedećih visokoobrazovnih institucija:

1. Palacky Univerzitet u Olomoucu, Češka Republika
2. Univerzitet Artois, Francuska
3. Katolički univerzitet u Lilu, Francuska
4. Univerzitet u Poitiersu, Francuska
5. Philipps Univerzitet u Marburgu, Njemačka
6. Univerzitet Saarland, Njemačka
7. Univerzitet Ca' Foscari u Veneciji, Italija
8. Politehnički institut u Beji, Portugal
9. Univerzitet Alexandru Ioan Cuza iz Jašija, Rumunija
10. Univerzitet u Geteborgu, Švedska
11. Univerzitet Fatih Sultan Mehmet Vakıf, Turska
12. Univerzitet u Glazgovu, Ujedinjeno Kraljevstvo

Više informacija o oba događaja su dostupna na <https://www.unsa.ba/novosti/pocela-medunarodna-sedmica-obuke-osoblja-na-univerzitetu-u-sarajevu>.

7.5. Dvanaesti sajam stipendija

Služba za međunarodnu saradnju Univerziteta u Sarajevu, u saradnji sa Ministarstvom za nauku, visoko obrazovanje i mlade Kantona Sarajevo i Ambasdom Republike Francuske, Campus France i Francuskim institutom, organizovala je **12. Sajem stipendija** koji je održan u srijedu, 26. oktobra 2022. godine. Važnost ovog susreta prepoznalo je 47 institucija iz 17 zemalja. Pored rektora, prisutne su ovom prilikom pozdravili i NJ. e. gospodin **Ito Makoto**, ambasador Japana u BiH, gospodin **Gianluca Vannini**, šef Operativnog odjela za društveni razvoj, civilno društvo i prekograničnu saradnju, Delegacija EU u BiH, gospodin **Minas Ounanian**, otpravnik poslova, Ambasada Grčke u BiH, gospodin **Lorenzo Donatelli**, prvi

sekretar Ambasade Italije u BiH prof. dr. **Aleksandra Nikolić**, ministrica za nauku, visoko obrazovanje i mlade Kantona Sarajevo, i gospodin **Miroslav Brčkalo**, savjetnik u Odjelu za međunarodnu naučnu, tehničku, obrazovnu, kulturnu i sportsku saradnju, Ministarstvo vanjskih poslova Bosne i Hercegovine. Cilj Sajma stipendija je da okupi sve institucije koje dodjeljuju i/ili administriraju stipendije ili dodjeljuju druge vrste finansijske podrške za studiranje u BiH i inostranstvu, te da im omogući da predstavljaju svoje programe stipendiranja i finansijske podrške i da priliku posjetiocima da sve informacije o mogućnostima stipendiranja daljnjeg obrazovanja u BiH ili u inostranstvu dobiju na jednom mjestu. Na 12. Sajmu stipendija učestvovali su:

1. OeAD, Austrija
2. Bosanskohercegovačko Američka Akademija Umjetnosti i Nauka, BiH
3. Bosnian Representative Association for Valuable Opportunities (BRAVO), BiH
4. Columbus Travel and Consulting, BiH
5. Erasmus Student Network, BiH
6. Nacionalni Erasmus+ ured u BiH, BiH
7. Experience Work and Travel, BiH
8. Fondacija "VII Akademija", BiH
9. Fondacija Humanost u akciji u BiH, BiH
10. Fondacija Konrad Adenauer, BiH
11. Ideas W&T doo, BiH
12. Inkubator društvenih inovacija "MUNJA", BiH
13. Karavan International doo, BiH
14. Ministarstvo civilnih poslova BiH, Sektor za obrazovanje, Državni CEEPUS ured BiH, BiH
15. AIESEC, BiH
16. Univerzitet u Sarajevu (ERASMUS), BiH
17. Univerzitet u Sarajevu (UPS), BiH
18. Western Balkan Alumni Association, Region Zapadni Balkan
19. Palacky Univerzitet u Olomoucu, Češka Republika
20. Ambasada Francuske u BiH, Campus France & Francuski institut, Francuska
21. CESI, Francuska
22. ESFAM, Francuska
23. Katolički univerzitet u Lilleu, Francuska
24. Univerzitet Le Mans, Francuska
25. Univerzitet Sciences Po, Francuska
26. Univerzitet Artois, Francuska
27. Univerzitet Caen Normandie, Francuska
28. Univerzitet u Avignonu, Francuska
29. Univerzitet Lyon 1, Francuska
30. Univerzitet u Poitiersu, Francuska
31. Ambasada Grčke u BiH, Grčka
32. Ambasada Italije u BiH, Italija
33. Ca' Foscari Univerzitet u Veneciji, Italija
34. Ambasada Japana u BiH, Japan

35. Ambasada Mađarske u BiH, Mađarska
36. DAAD (German Academic Exchange Service), Njemačka
37. Internship Programme of German Business for the Countries of the Western Balkans, Njemačka
38. Philipps Univerzitet u Marburgu, Njemačka
39. Univerzitet u Saarlandu, Njemačka
40. Politehnički institut u Beji, Portugal
41. Alexandru Ioan Cuza Univerzitet u Jašu, Rumunija
42. Ambasada SAD u BiH, SAD
43. US alumni asocijacija u Bosni i Hercegovini, SAD
44. Univerzitet u Novoj Gorici, Slovenija
45. Ambasada Republike Turkiye u BiH, Turska
46. Fatih Sultan Mehmet Vakıf Univerzitet, Turska
47. Univerzitet u Glasgowu, Velika Britanija

Najviše izlagača (institucija i univerziteta) koji su predstavili svoje programe finansiranja dolazi iz Republike Francuske. Jedan od ciljeva Sajma je i intenziviranje saradnje i povezivanja akademske zajednice Univerziteta u Sarajevu sa akademskom zajednicom Republike Francuske.

7.6. Obilježavanje 35 godina Erasmus programa

Info centar Evropske unije u Bosni i Hercegovini, u saradnji sa Službom za međunarodnu saradnju UNSA, Mladim evropskim ambasadorima i National Erasmus+ Office in Bosnia and Herzegovina obilježio je Evropsku godinu mladih i proslavio 35. rođendan Erasmus+ programa. Tim povodom je održana kratka panel diskusija u kojoj su učestvovali: Johann Sattler, šef Delegacije Evropske unije u Bosni i Hercegovini i specijalni predstavnik EU u BiH, Suad Muhibić, direktor Nacionalnog Erasmus+ Ureda u BiH, te prof. dr. sc. Enita Nakaš, prorektorica za međunarodnu saradnju UNSA. Tema panela je bila društveni i obrazovni značaj Erasmus + programa, s posebnim osvrtom kako Univerzitet u Sarajevu kao najveći korisnik Erasmus + programa može pomoći ostalim univerzitetima u BiH za razvoj Erasmus+ programa. Adnan Rahimić je održao prezentaciju o bitnim radnjama koje studenti moraju obaviti prije, u toku i nakon mobilnosti, nakon čega je otvorena sesija pitanja i odgovora studenata koji su htjeli saznati nešto više o svojim obavezama. Učesnice i učesnici su imali priliku poslušati svjedočanstva bivših Erasmus+ studenata, te saznati važne informacije o programima studentske mobilnosti ali o mogućnosti da postanu Mladi evropski ambasadori.